

CORONICA 2020

George Floyd ed ils morins


MARTIN CANTIENI

In video che mussa co in policist american smatga ses schanugl sin la tatona dad in arrestà da pel stgira enfin che quel mora. 8 minutas e 46 secundas a la lunga – durant che la victima di pliras giadas ch'ella na vegnia betg da trair flad. Quest video è il punct da partenza per demonstraziuns en tut ils Stadis Unids cunter la violenza da polizia e cunter il rassissem.

Las discussiuns davart il rassissem brutal, banal, verbal, structural ed instituziunal arrivivan era en Svizra. L'«Arena» prenda si la discussiun e dat en venter. En l'emissiun cun il titel «Jetzt reden wir Schwarzen» discorra ina maioritad da pel clera. Suenter criticas desastrusas e protestas vehementas en las medias socialas datti ina segunda emissiun cun ina maisa radunda.

Ina burascaca – per betg scriver shitstorm – datti era pervia dals chaus da tschigulatta. La Migros desista dals products da Dubler che na vul betg desister dal num «Mohrenkopf». Ed en Rumantschia? I dat in'emissiun da bischutaria. Tema: morins. Qua basta l'argument da la tradiziun per pender chaus nairs vid las ureglias. Jau recumandass en cas dad ina visita turistica da New York: Ponderar da sa decorar en autra guisa. E forsa era en l'Engiadina.

Tge è la «C(o)ronica da l'onn 2020»? – Jon Bischoff (illustraziun) e Martin Cantieni (text) commenteschan, resumeschan e parodieschan per la FMR 12 eveniments ch'ans han occupà durant l'onn 2020. Jon Bischoff da Vicosoprano illustrescha la fin da mintga mais per la FMR il «Mais da pais». Martin Cantieni da Turitg ha tranter auter gudagnà quest onn la concorrenza litterara rumantscha «Premi Term Bel».



ILLUSTRAZIUN JON BISCHOFF